



"Par une grande mission e covente une grande cualitât"

La Universitât furlane e à screât il 33^e an academic intun dai moments plui dificiis de sô storie: colpe dai tais dramatics ai finanziaments. Ma la retore Compagno no à dubis: strenzi i dincj e lâ indevant pontant su la cualitât.

4 il Diari

prin plan

AN V, NUMAR 5
25 DI MARÇ 2011

"Cheste comunitât di 20mil professôrs, ricercjadôrs, tecnics amministratîfs e students, che a à savût lâ dilunc, strenzint i dincj e lant indevant cun fuarce e cun dignitât, e merete un grant batiman": cun dute la sô relacion, puntilose e documentade, il retôr de Universitât furlane, Cristiana Compagno, e à motivât ad in plen il so invît calorôs ae comunitât regionâl, congregade ai 14 di Març li de aula magna di plaçâl Kolbe, a Udin; par screâ il XXXIII an academic. L'Ateneu regionâl al à frontât cun determinazion la dramatiche riduzion di finanziaments (tal 2010, 2,2 milions di euros in mancual a pet dal 2009 e une prevision di altris 9 milions di euros in mancual drenti dal 2012), rivant a justâ il so belanç e realizant i obietîfs di incressite e di rinovament che si jere proponût come cundizion par frontâ e par superâ la crisi internazionâl.



La retore Cristiana Compagno
cui ricercjadôrs de Universitât
a pene premiâts

"Par une grande mission e covente une grande cualitât"

"In doi agns – e à dit il retôr – o vin completât il procès di modernament e di cualificazion ulterior, otgnint risultâts straordinaris a nivel statâl e internazionâl, a la barbe de diminuzion des risorsis".

Ancje chest an, il retôr Cristiana Compagno e à començade la sô relacion cul salût par inglês ai invidâts internazionâi e cuntun pinsir par cjargnel. "Puartâ il salût dal retôr de Universitât dal Friûl ancje par furlan, come che o fâs simpri in ocasion de inaugurazion dal an academic – e à declarât – nol è dome un moment simbolic di atenzion pes nestris tradizions e pes nestris lidris storichis e culturâls, ma al è soredut il segnâl de nestre volontât di operâ ben, cun fuarce, cun cualitât e cun continuitât a pro dai nestri teritori, i nestri prin pont di riferiment".

Impensantsi des figuris dai patriots furlans Pacifico Valussi, che tai agns dal Resuriment talian al teo-

rizave l'autonomisim e il decentrament e parfin la fondazion de region Friûl, e Ippolito Nievo, il retôr al à invidât a partî des celebracions pai 150 agns de unitât taliane par marcâ il compit de universitât "come lûc e come impress par palesâ e par confermâ, te storie, i valôrs di democrazia, di libertât, di autonomie e di pluralisim te unitât", che a son ancje la lidris de Europe unide.

L'Ateneu dal Friûl, ancje chest an, al risulde una des primis dîs universitâts talianis e tal cuart puest fra chês dal Nordest, considerant i indicadôrs su la ricercje, su la didatiche e su la internazionalizazion.

Tal an che a à tacât a rivâ in Friûl i "Visiting Professor", al ven a stâi insegnants fra i plui cualificâts dal mont invidâts a lavorâ chenti par un ciert timp par favorî relacions e confronts internazionâi, e je indaûr cressude la mobilitât dai students (cun 173 students rivâts e 350 par-tûts, te suaze dai progjets Erasmus).

I cors di studi convenzionâts cun altris universitâts europeanis, che a ufrissin un titul cun valôr dopli, a son siet; e po a à tacât a operâ i vot "Area manager", che a varan di curâ i rapuarts cun Americhe meridionâl, Afriche, Australie, Canada, Cine, Indie, Orient mezan e Russie.

"Te classifiche de internazionalizazion dai ateneus statâi talians, prontade dal Censis pai agns 2008-2009 – e à pandût la professore Compagno –, la Universitât furlane e je seconde fra lis universitâts mezanis e seste te graduatorie asolude".

Chesta situazion e podarà miorâ ancjemò di plui, profitant dal sisteme des universitâts federadis, regolamentât tal articul 3 de leç statâl 240.

"Par nô, al sarâ decisif di operâ pe costituzion di rêts federadis cu lis universitâts che o vin dongje, te region, tal Venit e tal Trentin. Ma o

pensin che al sedi necessari cuntinuâ a slargjâ chestis rêts ancje tai paîs dongje. Par chel, o volin confrontâsi e colaborâ cu lis Universitâts di Lubiane, di Claufurt e di Graz e, plui a nord, viers il Baltic e, plui a soreli jevât, viers dute la region danubiane, te prospetive di cooperations teritoriâls simpri plui slargjadis, te suaze de euregion alpine-adriatiche e de macroregion adriatiche-baltiche".

Ancje te didatiche, l'ateneu regionâl si conferme ecellent. Il scandai Censis 2010 al calcole siet facultâts furlanis su dîs – Lenghis, Formazion, Medisine, Letaris, Agrarie, Economie, Siencis – fra lis primis dîs a nivel statâl; e fra chês siet, dôs a figurin tal prin puest assolût de graduatorie (Lenghis e Siencis de formazion, che e reste prime di cuatri agns incâ).

I efets di chesta cualitât si viodju ancje sul marcjât dal lavôr, dal moment che il rapuart Almalaurea

La Universitât furlane e à screât il 33^e an academic. Daûr de schene, un dai agns plui dificiis de sô storie: colpe dai tais dramatics ai finanziaments: 2,2 milions di euros in mancual a pet dal 2009 e une prevision di altris 9 milions di euros in mancual drenti dal 2012. Ma la retore Compagno non a dubis: strenzi i dincj e lâ indevant pontant su la cualitât.

2010 al à aciertât che il 57,3% dai dotôrs furlans a cjatin un puest drenti di un an (il 51,8% tal câs di laureade trienâl e il 65% tal câs de laureade magistral), a pet di une medie taliane dal 48,7%.

Altris grandis novitâts a segnaran l'an academic 2010-2011, stant che la riforme statâl de universitât e varès di "voltâ pagine e di sierâ une etc", come che al à bramât il retôr.

Biel che i comitâts pe redazion dal statût gnûf dal ateneu e dal so codic etic a lavorin, al è necessari – seont Cristiana Compagno – che stât e region a metin in vore chei impegn e chês improvission che si son cjapâts sù.

La Universitât furlane e spiete che il ministeri di Rome al screi il "sisteme che al premie il merit e no i privileç storics", stabilî de leç 240 che e à inmaneât la "agenzie statâl di valutazion des universitâts", e che e sedi aplicade la leç regionâl di riforme dal finanziament, cul ricognossiment clâr de "necessitât di inviâ procès di perecuozion fra ateneus".

"Noaltris o tirâr dilunc, al servizi de science e de ricercje – e à concludût il retôr Cristiana Compagno –, tal nestri impegn a pro dai zovins e pal lôr avignî, in armonie cu lis comunitâts teritoriâls e sburtâts de brabre di jessi part di chesta universitât, che e je motôr pal svilup civil, social e economic".

LUCHE NAZZI